

**Meeqqat illersuisuat aamma Meeqqat pillugit Siunnersuisoqatgiit pillugit Inatsisartut  
inatsisissaattut siunnersuut nr. xx xx2011.**

*(Ilaqutariinnermut, Kultureqarnermut, Ilageeqarnermut Naligiissitaanermullu  
Naalackersuisumit saqqummiunneqartoq)*

**pillugu**

**ILASSUTAASUMIK ISUMALIUTISSIISUT**

**Ilaqutariinnermut Peqqissutsumullu ataatsimiititaliamit saqqummiunneqartoq**

**Siunnersuutip pingajussaaneerneqarnissaanut saqqummiunneqartoq**

Ataatsimiititaliaq suliarinninnermini kingullermik ukuninnga inuttaqarpoq:

Inatsisartunut ilaasortaq Olga P. Berthelsen, Inuit Ataqtigiit, siulittaasoq  
Inatsisartunut ilaasortaq Debora Kleist, Inuit Ataqtigiit, siulittaasup tullia  
Inatsisartunut ilaasortaq Isak Hammond, Inuit Ataqtigiit  
Inatsisartunut ilaasortaq Astrid Fleischer Rex, Demokraatit  
Inatsisartunut ilaasortaq Knud Kristiansen, Atassut  
Inatsisartunut ilaasortaq Ruth Heilmann, Siumut  
Inatsisartunut ilaasortaq Malik Berthelsen, Siumut

Ulloq 8. november 2011 aappassaaneerinermini ataatsimiititaliap kaammattuineratigut  
ataatsimiititaliami suliassatut innersuuteqqinneqarpoq, inaarutaasumik ilassutaasumik  
isumaliutissiisummik saqqummiussinissaq siunertaralugu.

**Siunnersuutip Inatsisartuni aappassaaneerneqarnera**

Aappassaaneerinissamut isumaliutissiisummi ataatsimiititaliap isumaqtigiissup  
Naalackersuisut piumaffigai aappassaaneerinissamut allannguutissatut siunnersuutininik  
aralinnik saqqummiusseqqullugit. Ataatsimiititaliap kissaataa tamanna Naalackersuisunit  
akuerineqarpoq, allannguutissallu akuersissutigineqarlutik. Aappassaaneerinermini  
ikinnerussuteqartut Siumumeersut aamma Atassummeersut siunnersuummik  
allannguuteqarnissamut immikkut allannguutissatut siunnersuutininik saqqummiussinissamut  
kaammattuutaat Naalackersuisuniit akuersissutigineqanngilaq.

Siunnersuummi allannguutit pillugit isumaqatigiittoqarnera ataatsimiititaliap naammagisimaarpaa.

### **Siunnersuutip aningaasatigut kingunissai**

Ataatsimiititaliap naammagisimaarlugu maluginiarpaa Meeqqat pisinnaatitaaffii pillugit Sullissivimmi sulisussat ingerlatsinerlu qulakkeerniarlugit AIS 2012-ip inaarutaasumik suliarineqarnissaanut 1 mio kr.-nik ilanngussisoqarnissaanik Naalakkersuisut sulissuteqarnerat, taamaalilluni aningaasatigut killiussaq minnerpaamik 4.331.000 kr.-iussallutik.

Tamatuma qulakkeerneqarnissaa ataatsimiititaliap inassutigaa, taamaalilluni Meeqqat pisinnaatitaaffii pillugit Sullissiviup siunissami suliassai ataatsimut aningaasaqarnikkut tunngaveqarluni ikorfartorneqassammata.

Meeqqat pisinnaatitaaffii pillugit Sullissiviup aallaqqaataaniilli ingerlaannaq suliassanik tigusinissaminik piareersimanissaa ataatsimiititaliap aalajangiisuusutut isigaa.

### **MIPI-p (Meeqqat inuusuttullu pillugit ilisimasaqarfiup) ataatsimeeqatigineqarnera**

Ataatsimiititaliap ulloq 10. november 2011 MIPI-mi siulersuisunut sinniisumik ataatsimeeqateqarpoq.

Inatsisissamik suliaqarnerup ingerlanerani MIPI-p tusarniaanermut akissutaa ataatsimiititaliap ilisimaaraa, kisiannili 1. marts 2012 inatsit nutaaq atuutilersinneqarpat MIPI-p suliassaasa, ilisimasanik katersinerata kiisalu pisinnaasaasa meeqqat pisinnaatitaaffiinik sullissiviup nutaap atuutilernerani atatiinnarneqarnissaasa qanoq qulakkeerneqarnissaat annertunerusumik nalileqqaassallugu ataatsimiititaliap kissaatigisimavaa.

Siunnersuummi § 25, imm. 3-mi ikaarsaariarnermi aalajangersakkat ataatsimiititaliap ilisimaarai, tamatumalu kingorna MIPI-mi suliassat siulersuisunit aalajangerneqartutut Meeqqat pisinnaatitaaffii pillugit Sullissiviup allattoqarfianit nanginneqassallutik, Meeqqat pillugit Siunnersuisoqatigiit isiginiagassat suliniutissallu nutaat pillugit aalajangersarneqarnissaasa tungaanut.

Kalaallit Nunaata Meeqqanut illersuisoqalernissaanik kiisalu Meeqqat pillugit Siunnersuisoqatigeeqalernissaanik MIPI-p isumaqataanera ataatsimiititaliamit maluginiarneqarpoq. Ilisimasanik katersinerup MIPI-mi ingerlanneqarsimasup Meeqqat pisinnaatitaaffii pillugit Sullissivissamit ingerlatiinnarneqarnissaannut attanneqarnissaanullu qulakkeerinninnissaq pingaaruteqartuusoq ataatsimiititaliap maluginiarpaa.

Attaveqaatinik pilersitsinerup suliutigullu attaveqaatinik isumaginnineq MIPI-mi ingerlanneqarsimasup attatiinnarnissaa kiisalu Meeqqat pisinnaatitaaffii pillugit Sullissivissap atorsinnaasaa ataatsimiititaliamit neriuteqarfigineqarpoq. Tamanna Kalaallit Nunaannut namminermt avataanullu tunngatinneqarpoq. Pingaartumik kommuninik suleqateqarneq kiisalu meeqqat inuusuttuullu atugarisaat pillugit ilisimasanik katersineq kommunini siunissami attatiinnarneqassaaq.

Ukiuni makkunani meeqqat inuusuttullu kiisalu ilaqutariit atugarisaasa naalackersuinikkut immikkut isiginiarneqarnerujussuat erseqqissassallugu ataatsimiititaliap pissutissaqartippaa, pingaaruteqartorujussuusorlu Meeqqat pisinnaatitaaffii pillugit Sullissivissap aallaqqaataanilli pitsaanerpaamik ingerlanissaa kiisalu suliaq pitsaasorujussuaq MIPI-mit ingerlanneqarsimasooq suliffeqarfiup ingerlateqqissinnaassagaa

### **Ataatsimiititaliap inassutai**

Ataatsimiititaliami amerlanerussuteqartut Inuit Ataqtigiinneersut aamma Demokraatineersut siunnersuutip ilusimisut iluseqartillugu akuerineqarnissaa inassutigaat.

Ataatsimiititaliami ikinnerussuteqartut Siumumeersut aamma Atassummeersut siunnersuutip ilusimisut iluseqartillugu akuerineqarnissaa inassutigaat, kisiannili aappassaaneernissaanut ikinnerussuteqartut kaammattuutai naapertorlugit Naalackersuisut allannguutissatut siunnersuummik saqqummiussinisaannik kaammattuutit oqaatigeqqissallugit.

Taamatut oqaaseqarluni ataatsimiititaliap siunnersuut inaarutaasumik pingajussaaniigassanngortippaa.

Olga P. Berthelsen,  
Siulittaasoq

Debora Kleist

Isak Hammond

---

Astrid Fleischer Rex

---

Knud Kristiansen

Ruth Heilmann

Malik Berthelsen